

**Bosna i Hercegovina
Federacija Bosne i Hercegovine
Zeničko-dobojski kanton
OPĆINA VAREŠ
OPĆINSKO VIJEĆE**



**Broj: 01- 100 /10
Vareš, 05.05. 2010.godine**

Na osnovu čl. 6.,9.i 14. Zakona o komunalnim djelatnostima („Službene novine ZE-DO kantona, broj: 17/08 i člana 22. Statuta Općine Vareš, broj: 01-25/09 od 29.01.2009. godine, Općinsko vijeće Vareš, na 18.sjednici održanoj dana 05.05.2010. godine, d o n o s i

O d l u k u o komunalnom redu

I OPŠTE ODREDBE

Član 1.

Ovom odlukom uređuje se komunalni red i održavanje komunalnog reda, a naročito uređenje naselja, održavanje čistoće i čuvanje javnih površina, skupljanje, odvoz i postupanja sa smećem i drugim komunalnim otpadom, čišćenje i razgrtanje snijega i leda sa javnih gradskih površina i lokalnih puteva, sanitarno komunalno uređenje naselja, uklanjanje protivpravno postavljenih predmeta na javnim i drugim površinama, dekorisanje, te nadzor nad provođenjem odredbi ove odluke i kaznene odredbe.

Član 2.

Općina Vareš, JKP d.o.o. Vareš i pravna lica koja obavljaju komunalne djelatnosti, obavezni su:

- osigurati trajno obavljanje komunalnih djelatnosti, koje odgovaraju kvalitetom i standardom utvrđenoj visini cijene koju korisnici usluga plaćaju za njihovo izvršenje;
- osigurati održavanje komunalnih objekata i uređaja koji su u nadležnosti JKP d.o.o. Vareš i drugih komunalnih preduzeća, u stanju funkcionalne sposobnosti;
- poduzimati mjere za očuvanje i zaštitu okoliša;
- osigurati javnost i transparentnost rada.

Član 3.

Ova odluka će se primjenjivati na slijedećim javnim površinama:

1. javne saobraćajne površine: ulice, ceste, javni prolazi, javna stepeništa, mostovi, javni parkinzi i trotoari;
2. javne zelene površine: parkovi, drvoređi, posude sa ukrasnim biljem, živice i žive ograde, travnjaci, korito rijeke i vodotoci, dječija igrališta, zelene površine uz ceste u naselju, uz stambene, stambeno - poslovne i javne objekte i ostale slične površine;
3. uređene rekreacione površine, sportska igrališta, te ostali javni sportski objekti i uređaji na njima;
4. stajališta javnog autobusnog prijevoza, taxi stajališta, benzinske stanice i prostor oko njih;
5. otvoreni pijaćni i tržni prostori oko prodajnih objekata, javne česme i
6. neuređene javne površine i prostori i neizgrađena građevinska zemljišta.

Član 4.

Sva privredna društva, ustanove, organi uprave, mjesne zajednice, pravna i fizička lica, te građani na području općine Vareš dužni su pridržavati se i sprovoditi odredbe ove odluke.

II UREĐENJE NASELJA

Član 5.

Uređenjem naselja smatra se uređenje fasada i drugih vanjskih dijelova zgrada, izloga, reklama, natpisa, ograda, javne rasvjete, oglasnih tabli, svjetlećih i drugih oglasnih ormarića, komunalnih objekata i opreme, te korištenje i održavanje javnih, saobraćajnih i drugih površina.

1. UREĐENJE FASADA I DRUGIH VANJSKIH DIJELOVA ZGRADA

Član 6.

Vlasnici, suvlasnici odnosno korisnici zgrada i poslovnih prostora dužni su redovno održavati vanjske dijelove zgrada i objekata u tehničkom, funkcionalnom i estetskom pogledu i to: fasade, balkone, terase, lođe, vanjsku stolariju, krovove, izloge, vrata, prozore, oluke, dimnjake i sl.

Za objekte koji zbog dotrajalosti pojedinih vanjskih elemenata na zgradi predstavljaju opasnost po život i zdravlje ljudi i okolinu, komunalni inspektor izdat će rješenje nadležnom preduzeću za održavanje zgrada, vlasnicima, suvlasnicima odnosno korisnicima zgrada i poslovnih prostora, da se bez odlaganja izvrši opravka ili izmjena navedenih elemenata.

Član 7.

Prije preduzimanja radova na održavanju i uređenju fasada i drugih vanjskih elemenata, lica iz prethodnog Člana ove odluke dužna su pribaviti odgovarajuće rješenje o urbanistiskoj saglasnosti (u daljem tekstu: urbanistička saglasnost), za izvođenje radova.

Član 8.

Za zatvaranje balkona, lođa, terasa i sl. neophodno je pribaviti urbanističku saglasnost sa propisanim uslovima od Službe za prostorno uređenje.

Zabranjeno je na balkonima, lođama i terasama gomilanje starih stvari, ostataka namještaja, ogrijevnog drveta i drugih predmeta koji narušavaju estetski izgled objekta.

Sa prozora, balkona, lođa i terasa kao i drugih dijelova zgrada zabranjeno je istresanje krpa, tepiha i sl., bacanje smeća, ocjeđivanje vode ili na bilo koji drugi način prljanje objekta ili javne površine.

Član 9.

Pod dimnjačarskom djelatnošću se smatra provjeravanje ispravnosti i funkcionisanje dimovodnih objekata i uređaja za loženje i čišćenje dimovoda.

Dimnjaci u zgradama se moraju redovno održavati u ispravnom stanju i čistiti najmanje tri puta godišnje (zima, proljeće i jesen) a po potrebi i više puta.

Dimnjačarsku djelatnost obavlja pravno lice ili obrtnik kome je povjereno održavanje zajedničkih dijelova i uređaja zgrade u skladu sa Zakonom o upravljanju i održavanju stambenih i stambeno-poslovnih zgrada i Odlukom o kućnom redu u stambenim i stambeno-poslovnim zgradama na području općine Vareš ili lice registrovano za ove poslove.

Čišćenje dimnjaka i dimovodnih uređaja vrši se obavezno radnim danom, a izuzetno i neradnim danima, za šta je potrebna saglasnost komunalnog inspektora.

U dane čišćenja, odnosno spaljivanja dimnjaka u zgradama sa više stanova zabranjeno je loženje vatre, a korisnici dimnjaka dužni su zatvoriti rozetne i omogućiti dimnjačaru slobodan pristup do mjesta čišćenja.

Lice koje vrši dimnjačarsku djelatnost dužno je obavijestiti sve stanare zgrade, najkasnije dva dana prije čišćenja, o tačnom terminu čišćenja dimovodnih objekata.

2. UREĐENJE OGRADA

Član 10.

Ograđivanje javnih površina po pravilu se vrši metalnim, betonskim ili drvenim stubićima ili ukrasnom živicom na mjestima gdje neće ometati normalno kretanje pješaka i odvijanje saobraćaja.

Postavljanje ograda na površinama namijenjenim za individualno stanovanje odobrava se pod uslovima utvrđenim u urbanističkoj saglasnosti.

Član 11.

Ograde od ukrasne živice uz javne saobraćajne površine moraju se redovno orezivati tako da ne smetaju saobraćaju.

3. REKLAME, NATPISI, IZLOZI, REKLAMNI ORMARIĆI , PLAKATI I TENDE

Član 12.

Reklame, reklamne konstrukcije, reklamni panoi, reklamni svijetleći i drugi ormarići, oglasne table, svijetleće reklame i natpisi, jarboli zastava, transparenti, zaštitne tende i sl. mogu se postavljati samo na osnovu urbanističke saglasnosti izdate od Službe za prostorno uređenje.

Izuzetno, Služba za prostorno uređenje može za određene manifestacije periodičnog karaktera dati urbanističku saglasnost za privremeno postavljanje navedenih predmeta i objekata, ali se oni moraju ukloniti odmah po prestanku razloga zbog kojih su postavljeni.

Lica koja su bez odobrenja nadležnog općinskog organa izvršila postavljanje tende, firme ili reklame, dužna su pribaviti saglasnost u roku od 30 dana od dana stupanja na snagu ove Odluke.

Organ nadležan za izdavanje odobrenja iz gornjeg stava narediti će uklanjanje ili rusenje istih ukoliko su postavljeni bez odobrenja, a na teret vlasnika.

Član 13.

Plakati, oglasi, posmrtnice, obavještenja i slične objave, mogu se postavljati bez posebne urbanističke saglasnosti Službe za prostorno uređenje samo na oglasnim tablama i u oglasnim ormarićima.

Posebne samostojeće objave za kratkotrajajuće manifestacije mogu se postavljati na pločnike ili zelene površine samo na osnovu urbanističke saglasnosti Službe za prostorno uređenje i organizator ih mora ukloniti u naloženom roku ili će to učiniti komunalni inspektor o trošku organizatora.

Služba za prostorno uređenje, utvrdit će visinu naknade za postavljanje kao i rok za uklanjanje objava.

Izuzetno, (pred) izborni plakati mogu se postavljati i na druga mjesta koja odredi općinski načelnik, a političke stranke su dužne nakon provedenih izbora ukloniti ih o svome trošku ili će to učiniti komunalni inspektor o trošku političke stranke.

Uredno postavljene objave i plakate zabranjeno je prljati, oštećivati ili uništavati.

Član 14.

Zabranjeno je postavljanje plakata, oglasa i sličnih objava izvan dozvoljenih mjesta kao i ispisivanje poruka bilo kakvog sadržaja, a naročito na fasadama, stalnim ogradama, potpornim zidovima, drveću, rasvjetnim stubovima, stubovima saobraćajne signalizacije i ostalim stubovima, energetskim i drugim postrojenjima i drugim objektima kao i na trotoarima bez urbanističke saglasnosti.

Plakati, oglasi i slične objave postavljene izvan dozvoljenih mjesta uklonit će komunalni inspektor o trošku fizičkog ili pravnog lica koje ih je postavilo.

Član 15.

Reklamni natpisi, odnosno firme vlasnika ili korisnika poslovnih prostorija na zgradi moraju biti čitljivi, tehnički i estetski oblikovani, uredni i jezično ispravni i ne smiju svjetlom ili zvukom ometati ostale stanare u mirnom korištenju zgrade.

Izlozi, izložbeni ormarići i sl. postavljeni na zgradi moraju biti tehnički, estetski oblikovani i odgovarajuće osvijetljeni u skladu sa izgledom zgrade i okoline.

Član 16.

Svjetleće reklame i natpisi moraju biti upaljeni, a izlozi osvijetljeni tokom cijele noći, osim u slučaju štednje električne energije i drugim vanrednim okolnostima.

Neispravne svjetleće reklame odnosno natpise korisnik je dužan popraviti ili zamjeniti novim u roku od 3 dana od dana nastanka kvara.

Član 17.

Zabranjeno je postavljanje reklamnih natpisa i firmi na drveću, parkovskom zelenilu, na uličnim stubovima (rasvjetnim, saobraćajnim i sl), na javnim objektima koji imaju kulturnu i historijsku vrijednost, vjerskim institucijama, mostovima, spomen obilježjima i sličnim objektima.

Član 18.

U slučaju prestanka rada ili preseljenja u drugu poslovnu prostoriju, vlasnik reklamnog natpisa ili firme dužan je da ih ukloni u roku od 15 dana od dana prestanka poslovanja, a mjesto gdje je bio istaknut reklamni natpis ili firma da dovede u prvobitno stanje.

Ako vlasnik reklamnog natpisa ili firme ne postupi u skladu sa predhodnim stavom, uklanjanje istog izvršit će komunalni inspektor o trošku vlasnika.

4. GROBLJA, SPOMENICI, SPOMEN PLOČE, SKULPTURE I SLIČNI OBJEKTI

Član 19.

Pod održavanjem grobalja podrazumijeva se upravljanje, održavanje i uređivanje prostora i objekata (mrtvačnice u sklopu groblja, kapela i slično) za obavljanje ispraćaja i sahrane umrlih lica.

Održavanje grobalja obavljaju vlasnici ili posjednici prostora na kojem je locirano groblje.

Održavanje pasivnih mezarlika-grobalja, spomenika i spomen kosturnica i prateće infrastrukture na gradskom području vrši Javno komunalno preduzeće d.o.o. Vareš u skladu sa Programom finansiranja komunalnih djelatnosti (u daljem tekstu Program).

Program sadrži: obim i kvalitet održavanja pojedinih komunalnih objekata i uređaja i obavljanje komunalnih usluga, visinu potrebnih sredstava za realizaciju programa i raspored sredstava za svaku djelatnost posebno i po namjenama, kao i mjere za sprovođenje programa. Program donosi Općinsko vijeće najkasnije do 31. oktobra za narednu godinu, na prijedlog Općinskog načelnika.

Član 20.

Na području općine Vareš mogu se na objekte i površine postavljati i uklanjati ranije postavljeni spomenici, spomen ploče, skulpture i slični predmeti.

Postavljanje i uklanjanje vrši se na osnovu urbanističke saglasnosti Službe za prostorno uređenje, ukoliko posebnim propisom nije drugačije određeno.

Služba za prostorno uređenje je dužna da pribavi mišljenja nadležnih organa i autora spomenika ukoliko se postavlja ili uklanja spomen obilježje ili predmet za koji se utvrdi da ima obilježja spomenika kulture ili je spomenik kulture.

Član 21.

Postavljeni spomenici ne smiju se prljati, uništavati ili na drugi način oštećivati.

Predmet iz prethodnog stava dužan je održavati njihov vlasnik, odnosno lice po čijem je zahtjevu predmet postavljen, a ukoliko to lice nije poznato ili više ne postoji, o održavanju se brine Javno komunalno preduzeće d.o.o. Vareš u skladu sa Programom.

5. JAVNA RASVJETA

Član 22.

Javnu rasvjetu čine: rasvjetna tijela postavljena na ulicama, autobuskim stajalištima, parkovima, svjetleća tijela oko spomen objekata, sportskih objekata, vjerskih objekata, te oko mostova i sl.

Javna rasvjeta mora svijetliti cijele noći. Vrijeme uključivanja i isključivanja javne rasvjete mora se uskladiti sa godišnjim dobom i atmosferskim prilikama.

Posebnom odlukom Općinskog načelnika u slučaju potrebe štednje električne energije ili drugim vanrednim okolnostima utvrditi će se minimum potreba osiguranja javne rasvjete na području općine.

Objekti istorijske i kulturne vrijednosti moraju se osvijetliti tako da njihove arhitektonske i druge vrijednosti dolaze do punog izražaja, na način da izvor svjetlosti bude zaštićen od prolaznika.

Član 23.

O razmještanju rasvjetnih tijela odlučuje Služba za prostorno uređenje.

O održavanju javne rasvjete brine se preduzeće kome su povjereni ti poslovi u skladu sa Programom.

Utrošak električne energije za javnu rasvjetu kao i sredstva potrebna za održavanje i rekonstrukciju instalacija i uređaja za javno osvjjetljenje se planira Programom svake godine za narednu godinu.

Član 24.

Zabranjeno je oštećivanje i uništavanje rasvjetnih stubova i rasvjetnih tijela, kao i lijepljenje i postavljanje oglasa, obavještenja, reklama i slično.

Na rasvjetne stubove mogu se izuzetno postavljati ukrasne zastavice i informativno propagandni panoi, uz odobrenje Službe za prostorno uređenje, pod uslovima propisanim ovom odlukom.

6. SPORTSKA, DJEČIJA IGRALIŠTA I DRUGI JAVNI SPORTSKI OBJEKTI

Član 25.

Sportska i dječija igrališta i drugi javni sportski objekti kao i objekti na njima moraju se održavati u ispravnom stanju.

Sportska igrališta i sportske objekte održava u ispravnom stanju i stara se o održavanju lice koje tim površinama upravlja ili ih koristi.

Za ispravnost i urednost dječijih igrališta odgovorno je Javno komunalno preduzeće d.o.o. Vareš u skladu sa Programom .

7. PRIVREMENO ZAUZIMANJE JAVNIH POVRŠINA

Član 26.

Pod zauzimanjem javne površine smatra se:

- postavljanje ljetnih bašti koje nisu sastavni dijelovi postojećih poslovnih objekata i prostorija;
- postavljanje pokretnih objekata na točkovima, tezgi, rashladnih uređaja, stolova za prodaju lutrija, štampe, knjiga, cvijeća, ukrasnih predmeta i sl.;
- postavljanje bašti i tendi i privremenih prodajnih i izložbenih mjesta ispred poslovnih objekata i prostorija;
- postavljanje zabavnih parkova, cirkuskih šatri i drugih zabavnih sadržaja;

- zauzimanje i javne površine i na bilo koji drugi način, a u svrhu obavljanja privrednih i drugih djelatnosti(npr. betoniranje ulaza, prilaza...)

Član 27.

Zauzimanje javnih površina vrši se na osnovu uslova utvrđenih u urbanističkoj saglasnosti Službe za prostorno uređenje.

Urbanistička saglasnost iz prethodnog stava izdaje se na osnovu zahtjeva i u skladu sa Programom utvrđivanja lokacija za zauzimanje javnih površina.

Član 28.

Program utvrđivanja lokacija za zauzimanje javnih površina donosi Općinski načelnik na prijedlog Službe za prostorno uređenje.

Program iz prethodnog stavka sadrži detaljno označene površine na kojima se može vršiti privremeno zauzimanje, urbanistički-tehnički uslovi i druge elemente potrebne za izdavanje urbanističke saglasnosti za zauzimanje javne površine.

Član 29.

Urbanistička saglasnost za zauzimanje javnih površina u svrhu postavljanja ljetnih bašti koje se ne nalaze ispred poslovnih objekata ili nisu sastavni dijelovi poslovnih objekata na osnovu Programa iz člana 27. ove odluke vrši se nakon provedene licitacije. Licitaciju provodi Služba za prostorno uređenje.

Član 30.

Zauzimanje javnih površina, osim u slučajevima iz prethodnog člana, odobrava se na osnovu pojedinačnih zahtjeva.

Član 31.

Za privremeno zauzimanje javne površine privremeni korisnik dužan je plaćati naknadu utvrđenu rješenjem o urbanističkoj saglasnosti koja se uplaćuje na transakcijski račun Općine u roku utvrđenom u rješenju.

Iznos naknade iz prethodnog člana propisuje se Odlukom o općinskim komunalnim taksama.

Član 32.

Urbanističkom saglasnosti za zauzimanje javne površine određuje se lice kome se odobrava zauzimanje javne površine, detaljna oznaka i površina lokacije koja se odobrava, namjena, vrsta objekta, vremenski period na koji se odobrava zauzimanje, visina naknade i drugi elementi.

Privremeno zauzimanje javnih površina može se odobriti najviše na period do jedne godine. Izuzetno, ukoliko se radi o prvom korisniku javne površine koji je imao posebne troškove u vezi sa privođenjem površina namjeni za koju se odobrava zauzimanje (instalacije i sl), zauzimanje se može odobriti i na duži period, ali ne duži od dvije godine.

Član 33.

Izuzetno od postupka propisanog za zauzimanje površina, zauzimanje se može odobriti samo na osnovu zahtjeva ukoliko se radi o zauzimanju javne površine koja je sastavni dio poslovnih prostorija u kojoj podnosilac zahtjeva obavlja poslovnu djelatnost u svrhu izlaganja i reklamiranja robe ili usluga.

Izuzetno, u svrhu prodaje ukrasnih predmeta, cvijeća, čestitki, suvenira i sl. u dane državnih i drugih praznika kad je to uobičajeno, može se odobriti zauzimanje javnih površina na osnovu zahtjeva najviše do 15 dana i do 5m² s tim da se za ovo zauzimanje javnih površina plaća povećana naknada odlukom koju utvrđuje Općinski načelnik na prijedlog Službe za prostorno uređenje.

Član 34.

Mjesta na javnim površinama na kojima je odobreno postavljanje stolova i stolica radi postavljanja ljetnih bašti, bez obzira da li su sastavni dijelovi postojećih poslovnih prostorija ili nisu, moraju ispunjavati slijedeće uslove:

1. prostor koji ostaje za pječake ne smije biti uži od 2 metra, a udaljenost ograde ljetne bašte od ruba saobraćajnice ne smije biti manja od 1 metra.
2. U površinu bašte uračunava se i površina živice, žardinjere ili druge ograde, koja se postavlja uz rubove bašte.
3. U slučaju da se postavlja pokretna ograda, visina iste može iznositi do 1 metar
4. ukoliko se prostor ljetne bašte nalazi djelimično ili u cjelosti na javnoj zelenoj površini, površina se mora zaštititi montažno – demontažnom podlogom
5. postavljanje tende kao načina zaštite od sunca i kiše može se izvršiti isključivo pod uslovima utvrđenim u urbanističkoj saglasnosti
6. Po prestanku rada ugostiteljske radnje kao i po proteku vremena određenog u urbanističkoj saglasnosti za zauzimanje javne površine, mora se ukloniti sve što je bilo u funkciji ljetne bašte, a površina se mora privesti prvobitnoj namjeni u roku od 15 dana od dana prestanka rada, odnosno isteka roka.
7. Izuzetno, može se dozvoliti zadržavanje tendi koje su fiksirane za tlo (samostojeće tende), i koje ne utiču na slobodno korištenje prostora nakon prestanka rada ljetnih bašti, uz plaćanje paušalne naknade za godišnje korištenje u iznosu od vrijednosti jedne mjesečne naknade korištenja ljetne bašte koji pokriva tenda i obračunava se prilikom izdavanja urbanističke saglasnosti za zauzimanje javne površine.

Član 35.

Mjesta na javnim površinama na kojima je odobreno postavljanje pokretnih objekata iz člana 26. stav 1. alineja 2. ove odluke moraju ispunjavati slijedeće uslove:

1. Postavljanjem ovih objekata ne smije se spriječiti ili otežati korištenje zgrada ili drugih objekata i ugrožavati bezbjednost saobraćaja vozila i pješaka.
2. Objekti se mogu postavljati samo na mjesta na kojima neće dolaziti do suvišne buke, prljanja javne površine i ometanja saobraćaja, te na kojim se neće umanjiti estetski i opći izgled tog mjesta.

Korisnici su dužni ove objekte kao i neposrednu okolinu držati u čistom i urednom stanju, a za reklamiranje artikala koje nude ne smiju koristiti okolne objekte i površinu.

Član 36.

Korisnici javnih površina dužni su se u svemu pridržavati uslova određenih u urbanističkoj saglasnosti o zauzimanju javne površine.

Objekti koji se nalaze na javnim površinama bez urbanističke saglasnosti službe, ili protivno saglasnosti, kao i sa saglasnosti čiji je rok istekao, kao i objekti korisnika koji se ne pridržava uslova određenih u urbanističkoj saglasnosti za zauzimanje javne površine uklonit će se o trošku korisnika u roku od 24 sata. Žalba izjavljena protiv rješenja o uklanjanju ne odlaže izvršenje rješenja.

U slučaju da korisnik neuredno izmiruje svoju obvezu plaćanja naknade tako da duguje više od tri mjesečna iznosa, urbanistička saglasnost za korištenje javne površine će se poništiti, a protiv korisnika će se pokrenuti sudski postupak za naplatu dugovanja.

U slučaju zauzimanja javne površine veće od odobrene, korisnik je dužan za višak zauzete površine isplatiti dvostruku naknadu za sve vrijeme trajanja zauzimanja viška javne površine. Korisnik je dužan višak zauzete površine dovesti u prvobitno stanje u roku od 3 dana. U suprotnom će se pokretni objekat ukloniti o trošku vlasnika.

8.RASKOPAVANJE JAVNIH POVRšina

Član 37.

Ulice, trotoari i druge javne površine mogu se raskopavati radi postavljanja, uklanjanja ili izmjene podzemnih instalacija i uređaja samo pod uslovom da preduzeće ili lice koje to zahtijeva dobije za takvu radnju odobrenje nadležnog organa uprave.

Uz zahtjev za izdavanje odobrenja mora se naznaci mjesto izvodjenja radova i vrijeme potrebno da se ti radovi izvedu, sa rokom pocetka izvodjenja i zavrsetka radova, te saglasnosti drugih vlasnika podzemnih instalacija(ako se nalaze na tom mjestu)

Ukoliko bi se nakon izvjesnog vremenskog perioda, a najkasnije u roku od godinu dana od zavrsetka radova na mjestu gdje su izvedeni radovi pojavilo vidljiva ulegnuća ili napuknuće površine koje ometa ili ugrožava saobraćaj, investitor je dužan da na zahtjev nadležnog općinskog organa otkloni o svom trošku uočene nedostatke bez obzira od kojeg je organa uprave izdato odobrenje (općinski, kantonalni, federalni)

9.KOMUNALNI OBJEKTI I UREĐAJI U OPŠTOJ UPOTREBI

Član 38.

Na području općine na mjestima koje odredi Služba za prostorno uređenje postavljaju se ili izgrađuju fontane, česme, saksije za cvijeće, javni nužnici, javne telefonske govornice, poštanski sandučići, korpe za smeće, klupe za sjedenje i drugi komunalni objekti i uređaji koji služe opštoj upotrebi.

Član 39.

Na području općine postavljaju se fontane i česme na mjestima koje odredi Služba za prostorno uređenje.

O održavanju fontana i česmi brine se Javno komunalno poduzeće d.o.o.Vareš u skladu sa Programom

Član 40.

Na području općine na mjestima koje odredi Služba za prostorno uređenje postavljaju se korpe za smeće i niše za kontejnere.

Zabranjeno je postavljanje korpi za smeće na:

1. stubove saobraćajne signalizacije
2. drveće i drugo rastinje
3. mjesta na kojima ometaju sigurnost saobraćaja
4. druga mjesta na kojima narušavaju estetski izgled naselja

O održavanju i zamjeni korpi za smeće brine se Javno komunalno preduzeće d.o.o Vareš u skladu sa Programom.

Član 41.

Služba za prostorno uređenje određuje mjesta na području općine na kojima se postavljaju klupe za sjedenje.

O postavljanju, održavanju i zamjeni klupa za sjedenje brine se Javno komunalno preduzeće d.o.o. Vareš u skladu sa Programom.

Član 42.

Javni nužnici moraju se održavati u ispravnom i urednom stanju te moraju raditi tokom dana najmanje u vremenu od 7-20 sati.

Javnim nužnicima upravlja i održava ih pravno ili fizičko lice kome je povjereno upravljanje i održavanje javnim nužnicima.

Član 43.

Javne telefonske govornice i poštanski sandučići se postavljaju na mjesta koja odredi Služba za prostorno uređenje.

Javna preduzeća telefonskog i poštanskog saobraćaja dužna su ista održavati u ispravnom stanju, te kvarove i oštećenja ukloniti u roku od 3 dana.

Član 44.

Zabranjeno je komunalne objekte i uređaje u opštoj upotrebi uništavati ili na bilo koji drugi način oštećivati.

10.PIJACE NA MALO

Član 45.

Lokacije pijaca na malo na području općine utvrđuje Općinsko vijeće na prijedlog Općinskog načelnika.

Pijace na malo na kojima se obavlja promet poljoprivrednih i drugih proizvoda moraju biti čiste i uredne, o čemu se brine JKP d.o.o.Vareš koje upravlja i održava pijacu na malo.

Član 46.

Na pijacama na malo postavljaju se odgovarajući kontejneri i korpe za smeće i otpatke. JKP d.o.o.Vareš dužno je osigurati ispravnost i čistoću opreme i predmeta na pijaci na malo. Pijačni red donosi nadzorni odbor JKP d.o.o.Vareš uz saglasnost Općinskog načelnika. Pijačni red u smislu prethodnog stava JKP d.o.o.Vareš dužno je donijeti u roku od 60 dana od dana stupanja na snagu ove odluke.

Član 47.

Pijačnim redom utvrđuje se naročito:

- radno vrijeme
- proizvodi koje je dozvoljeno prodavati na tržnici na malo
- čišćenje i odvoženje smeća
- visina naknade za korištenje tržnice na malo
- drugi elementi neophodni za rad tržnice na malo

JKP d.o.o.Vareš i korisnici pijačnog prostora dužni su pridržavati se pijačnog reda.

Član 48.

JKP d.o.o.Vareš dužno je najkasnije u roku od 4 sata po isteku radnog vremena pijace na malo, prostor pijace na malo očistiti.

Član 49.

Zabranjeno je korištenje drugih javnih površina izvan prostora za pijacu na malo u svrhu prodaje ili izlaganja poljoprivrednih, prehrambenih, tekstilnih i drugih proizvoda bez urbanističke saglasnosti Službe za prostorno uređenje.

III.RED KOD UTOVARA, ISTOVARA I SMJEŠTAJA GRAĐEVINSKOG MATERIJALA , ROBE NA JAVNIM POVRŠINAMA I OGRIJEVA

Član 50.

Za istovar, smještaj i utovar građevinskog materijala, podizanje skela, te popravke vanjskih dijelova zgrada i slične građevinske radove, može se u skladu sa propisima o sigurnosti saobraćaja, privremeno koristiti javna površina ili neizgrađeno građevinsko zemljište.

Član 51.

Urbanističku saglasnost za korištenje javne površine za radove iz prethodnog člana, na zahtjev izvođača radova ili investitora, izdaje Služba za prostorno uređenje.

Uslovi i način istovara i smještaj građevinskog materijala, mjere sigurnosti, rok važenja, način održavanja deponije materijala i drugi uslova utvrđuju se urbanističkom saglasnosti koju izdaje Služba za prostorno uređenje.

Korištenjem javne površine proizilazi obaveza plaćanja naknade za korištenje zauzete površine osim u slučajevima kada je investitor radova općina Vareš i preduzeća i ustanove čiji je osnivač općina Vareš.

Član 52.

Izvođač radova je dužan najkasnije 24 sata po završetku radova i uklanjanja opreme sa javne površine obavjestiti Službu za prostorno uređenje da mu javna površina više nije potrebna. Nadležna služba će izvršiti pregled zauzete površine, te ako se ustanovi da postoji oštećenje, donijeti rješenje o obavezi dovodenja zauzete površine u prvobitno stanje. Bez zapisnika o prijemu javne površine nakon izvođenja radova ne može se izdati upotrebna dozvola za objekat.

Član 53.

Za istovar drva, uglja i sličnih materijala, te za cijepanje drva, koriste se dvorišta zgrada, a izuzetno samo dio javne površine na taj način da se time ne ometa saobraćaj vozila i pješaka. Ogrjevni materijal mora se ukloniti sa javne površine najkasnije u roku od 48 sati, a upotrijebljena površina se mora očistiti, a eventualna oštećenja sanirati. Izuzetno odlaganje ogrjevnog drveta na javnu površinu je dozvoljeno za stanare zgrada koje su imale centralno grijanje, a koje trenutno nije u funkciji, u periodu od 1. septembra do 1. aprila, na mjestima koje odredi komunalni inspektor ili eko policija. Na gradskom području zabranjen je istovar ogrjevnog drveta u trupcima, kao i rezanje ogrjevnog drveta motornom pilom.

Pod gradskim područjem se podrazumijevaju naseljena mjesta Ljepovići, Vareš i Vareš Majdan.

IV ODRŽAVANJE ČISTOĆE I ČUVANJE JAVNIH POVRŠINA

1. JAVNE POVRŠINE

Član 54.

Pod održavanjem čistoće na javnim površinama smatra se:

1. čišćenje (uklanjanje papira, kamena, zemlje, smeća i drugih otpadaka), pranje, čišćenje i odvoz snijega i posipanje solju zaleđenih površina (kolovozi i trotoari, putevi, staze, javna stepeništa, fontane, javne česme).
2. čišćenje smeća i drugih otpadaka u koritima rijeka i potoka;
3. čišćenje papira, smeća, kamena i svih vrsta kabastih otpadaka na neuređenim površinama između stambenih i drugih objekata;
4. čišćenje, pranje i održavanje sanitarno-higijenskih uvjeta u javnim nužnicima;
5. održavanje i čišćenje korpi za otpatke i kontejnera
- 6.

Član 55.

Vanredno čišćenje javnih saobraćajnih površina vrši se po nalogu Komunalnog inspektora. Vanredno čišćenje javnih saobraćajnih površina odredit će se kada zbog vremenskih nepogoda ili sl. događaja javna saobraćajna površina bude prekomjerno zaprljana.

Član 56.

Javne saobraćajne površine čiste se u pravilu ručno danju, a peru u vremenu od 05 do 10 sati i od 16,00 do 20,00 sati.

Član 57.

Održavanje čistoće na javnim površinama vrši Javno komunalno preduzeće Vareš d.o.o., u skladu sa Programom.

Član 58.

Pravna i fizička lica koje obavljaju djelatnost u objektima uz javne površine dužna su javnu površinu svakodnevno održavati u čistom i urednom stanju. Vlasnik ili korisnik sportskih i rekreacionih objekata, zabavnih parkova ili igrališta, organizator javnih skupova, priredbi i zakupac javnih površina koji ih povremeno koriste,

obavezni su osigurati čišćenje površina koje služe kao pristup objektima ili za postavljanje objekta tako da te površine budu očišćene u roku od 12 sati po završetku priredbe odnosno vremena korištenja objekta.

Član 59.

Na javnoj površini ne smije se ostavljati niti bacati nikakav otpad, te se ove površine ne smiju na bilo koji drugi način prljati, a posebno se zabranjuje:

1. bacanje i ostavljanje izvan kontejnera i korpi za smeće raznog otpada;
2. bacanje gorećih predmeta u kontejnere i korpe za smeće,
3. odlaganje otpadnog građevinskog materijala, zemlje i sl.;
4. popravak, servisiranje i pranje vozila;
5. ispuštanje ulja, svih vrsta otpadnih tekućina, prljavih i masnih tečnosti, boja, lakova, kreča, životinjskog izmeta, fekalija i bilo kojih drugih tečnosti koje prljaju javnu površinu;
6. oštećenje kontejnera i korpi za smeće;
7. oštećenje ili uništavanje ograda, klupa i dječijih igrališta (naprava za dječiju igru);
8. uništavanje zelenila, kao i hodanje izvan određenih staza i sjedenje na travi;
9. oštećenje kontejnera za smeće kao i nekontrolisano formiranje deponije smeća;
10. paljenje otpada, lišća, papira i sl.;
11. zagađivanje i bacanje otpada i otpadnih materijala u vodotokove i na obale vodotokova;
12. napasanje stoke;
13. vršenje nužde, pljuvanje i sl.

Član 60.

Vozila koja učestvuju u saobraćaju ne smiju prljati javne površine.

Vozila koja prevoze tekući ili rasuti materijal moraju biti ispravna kako se iz njih ne bi prosipao teret.

Zabranjuje se prelaz teškog vozila preko javnih površina van kolovoza, ako bi se javne površine, prelaskom vozila usljed njegove težine, visine ili nekih drugih razloga, mogle uništiti.

Ukoliko dođe do oštećenja ili uništenja usljed nepoštovanja prethodnog stava, počinitelj štete je dužan sanirati istu o svom trošku.

Zabranjuje se koristiti javne površine za smještaj robe, ambalaže, motornih vozila i drugih stvari izuzev kad to dozvoli nadležni organ u skladu sa propisima

Zabranjuje se koristiti javna površina za prodaju bilo kakve robe ili obavljanje druge privredne djelatnosti bez odobrenja nadležnog općinskog organa uprave.

2. ODVOĐENJE ATMOSFERSKIH I OTPADNIH VODA SA JAVNE POVRŠINE

Član 61.

Ulične slivnike, kao uređaje za odvođenje atmosferskih i otpadnih voda sa javnih saobraćajnih površina, održava Javno komunalno preduzeće d.o.o. Vareš u skladu sa Programom.

Javno komunalno preduzeće Vareš dužno je redovito čistiti i održavati slivnike i slivničke veze propusnim i ispravnim, radi osiguranja od plavljenja javnih saobraćajnih površina.

Zabranjeno je nenamjensko korištenje slivnika.

Član 62.

Svi otvori moraju biti zatvoreni poklopcima od rebrastog ili hrapavog materijala da bi se izbjeglo klizanje.

Dotrajali odnosno nefunkcionalni zatvarači i poklopci moraju se zamijeniti.

U vrijeme izvođenja bilo kakvih radova u otvorima, isti se moraju ograditi posebnim pregradama tako da sprečavaju prilaz prolaznicima i obilježiti vidljivim znacima upozorenja, te po završetku radova moraju se propisno zatvoriti.

3. JAVNE ZELENE POVRŠINE

Član 63.

Pod održavanjem zelenih javnih površina smatra se: čišćenje smeća, kamenja, korova, lišća, košenje trave, sječa suhih i oštećenih stabala, potkresavanje stabala, sađenje cvijeća i trave, održavanje klupa, staza, korpi za otpatke i zamjena oštećenih i sl.;

Član 64.

Javne zelene površine moraju se održavati u skladu sa Programom
Za održavanje javnih zelenih površina odgovorno je Javno komunalno preduzeće d.o.o. Vareš.

Član 65.

Sječa stabala odobrit će se u slijedećim slučajevima:

- ako je stablo potpuno prestalo sa vegetacijom;
- ako postoji opasnost od pada stabala;
- ako stablo svojim postojanjem i rastom ugrožava stabilnost stambenih ili poslovnih objekata;
- u slučajevima kada se stablo nalazi na lokalitetu objekta za koji je izdato odobrenje za građenje;

Član 66.

Sječa i potkresivanje stabala može se odobriti u slijedećim slučajevima:

- ako je stablo djelimično prestalo da vegetira;
- ako stablo u znatnoj mjeri oštećuje stambene ili poslovne objekte;
- ako stablo oštećuje instalacije komunalne infrastrukture;
- u slučajevima kada Služba za prostorno uređenje i obnovu ocijeni da stablo svojim postojanjem i rastom utiče na uvjete življenja stanara okolnih objekata;

Član 67.

Rješenje o odobrenju za sječu i potkresivanje stabala iz prethodna dva člana, na osnovu zahtjev zainteresirane stranke i mišljenja komunalnog inspektora, donosi Služba za prostorno uređenje i obnovu

Član 68.

Radi zaštite javnih zelenih površina, zabranjeno je:

1. sječa stabala suprotno članovima 65. i 66.
2. rezanje i skidanje grana sa drveća;
3. guljenje kore stabla, zasijecanje, zarezivanje, zabijanje eksera i vijaka, stavljanje plakata na drveće i sl.;
4. uništavanje travnjaka, iskopavanje i odnošenje zemlje i biljaka;
5. napasanje životinja na javnim zelenim površinama;
6. oštećivanje stabla raznim materijalima prilikom gradnje, utovara, istovara i dopreme građevinskog materijala, drva, uglja i sl.;
7. oštećivanje javne rasvjete, klupa i sl.;
8. ispuštanje otpadnih voda, kiselina, ulja i fekalija na javne zelene površine;
9. parkiranje vozila na javnoj zelenoj površini;
10. loženje vatre i potpaljivanje stabala;
11. pranje, čišćenje i opravka vozila na javnim zelenim površinama;
12. istovar i skladištenje raznog materijala, ogrijevnog drveta, uglja, otpadnog drveta, željeza, lima i slično na javnim zelenim površinama;
13. bacanje otpadaka u fontane;
14. upotreba u druge namjene površina namjenjenih za dječiju igru i korištenje sprava za igru od strane odraslih osoba kao i upotreba ovih sprava suprotno njihovoj namjeni;

15. ležanje i spavanje na parkovskim klupama, sjedenje na naslonima klupa;

Član 69.

Lice koje učini štetu na zelenim površinama svojim štetnim radnjama, upotrebom vozila i sl. naknadit će pričinjenu štetu preduzeće za održavanje zelenih površina. Stvarna šteta procjenjuje se prema cjeniku pravne osobe koja održava zelene površine.

V SAKUPLJANJE, ODVOZ I POSTUPANJE SA SAKUPLJENIM KOMUNALNIM OTPADOM

1. VRSTE KOMUNALNOG OTPADA

Član 70.

Komunalnim otpadom smatra se:

- smeće na javnim površinama;
- kućno smeće;
- krupni otpad;

Član 71.

Smećem na javnim površinama smatraju se svi otpaci koji nastaju na tim površinama. Sakupljanje i odvoz otpada sa javnih površina vrši se u skladu sa poglavljem III ove odluke.

Član 72.

Kućnim smećem smatraju se čvrsti otpaci koji nastaju u stambenim objektima, zajedničkim prostorijama stambenih zgrada, poslovnim prostorijama, garažama i dvorištima, a koji se po svojoj veličini mogu odlagati u kontejnera.

Kućnim smećem ne smatraju se: zemlja, otpaci i ostaci građevinskog materijala, podrumsko, dvorišno i tavansko smeće u većim količinama, kao i drugi krupni otpaci koji nastaju u procesu zanatske, građevinske, poljoprivredne ili druge proizvodnje i slično.

Član 73.

Krupnim otpadom smatraju se čvrsti otpaci koji nastaju u stanovima, zajedničkim prostorijama stambenih zgrada i poslovnim prostorijama, a koji se po svojoj veličini, količini ili postanku ne smatraju kućnim smećem u smislu predhodnog Člana, a naročito: kućanski aparati, pokućstvo, sanitarni uređaji, kartonska ambalaža u većim količinama ili većih dimenzija, olupine vozila i slično te njihovi dijelovi. Krupni otpad predstavljaju i otpaci građevinskog materijala u manjim količinama.

Član 74.

Odvoz kućnog smeća i krupnog otpada sa područja svih mjesnih zajednica i podružnica mjesnih zajednica vrši Javno komunalno preduzeće d.o.o. Vareš koje je dužno da na osigura efikasno i ekonomično prikupljanje na način koji zadovoljava higijensko-zdravstvene propise. Odluku za odvoz smeća i krupnog otpada sa područja pojedinih mjesnih zajednica i podružnica mjesnih zajednica donosi nadzorni odbor Javnog komunalnog preduzeća d.o.o. Vareš uz saglasnost Općinskog načelnika.

Član 75.

Svi vlasnici, odnosno korisnici stambenih i poslovnih prostora, kao i privremeno zauzetih javnih površina dužni su plaćati mjesečnu naknadu na ime prikupljanja i odvoza smeća nadležnom preduzeći.

Član 76.

- (1) Visinu cijene i način plaćanja komunalne usluge predlaže davalac komunalne usluge, na temelju detaljne kalkulacije, a u skladu sa odredbama čl. 10., 11. i 12. Zakona o komunalnim djelatnostima.

- (2) Cijena komunalne usluge sadrži sve troškove tekućeg održavanja i funkcioniranja komunalnog sistema, te troškove nabave novih stalnih sredstava davaoca komunalne usluge i anuitete kreditnih zaduženja za strateške projekte prema članu 34. stav 2. i 3. Zakona o komunalnim djelatnostima.
- (3) Odnos cijena komunalnih proizvoda i usluga individualne komunalne potrošnje za potrošače domaćinstva u stambenim objektima i stanovima i potrošače pravne osobe subjekte u poslovnim objektima i prostorima određuje svojim propisom Općinsko vijeće.
- (4) U cijenu komunalne usluge uključena je amortizacija koja se sastoji iz amortizacije stalnih sredstava koja davaocu komunalne usluge služe kao sredstvo za rad i amortizacije stalnih sredstava infrastrukturnog komunalnog sistema, koja po svom karakteru moraju biti ili već jesu javna dobra u općoj uporabi.
- (5) Davaoac komunalne usluge sredstva izdvojena po osnovi amortizacije koristi za obnavljanje stalnih sredstava rada po programu poduzeća, a dio amortizacije stalnih sredstava infrastrukturnog komunalnog sistema, odnosno dobara u općoj uporabi koristi prema programu na koji suglasnost daje vlasnik tih sredstava u općoj uporabi.
- (6) Validnost kalkulacije i utvrđivanje cijena komunalnih usluga vrši se u skladu sa statutom javnog preduzeća
- (7) Cijena komunalne usluge za pruženu komunalnu uslugu plaća se davaocu komunalne usluge
- (8) Ukoliko organ iz stavka (3) ovoga članka utvrdi nižu cijenu usluge od ekonomske cijene korištenja ili je ne usuglašava s rastom cijena, onda je isti organ davaocu komunalne usluge obvezan naknaditi razliku sredstava.

Član 77.

Korisnik komunalne usluge dužan je platiti utvrđenu cijenu za pruženu komunalnu uslugu, u ugovorenom – propisanom roku, kao i izvršiti prijavu i odjavu svih promjena (promjena adrese, broja članova domaćinstva, površina objekta i sl.), u roku od 8 dana od dana nastale promjene.

O sporovima između korisnika i davaoca komunalne usluge odlučuje nadležni sud.

Član 78.

Evidencija o broju korisnika usluga za svaku stambenu jedinicu utvrđuje se putem kućnih savjeta i savjeta mjesnih zajednica, odnosno utvrđivanjem stanja od strane ovlaštenih osoba JKP d.o.o. Vareš.

Svaku promjenu u domaćinstvu potrošač je dužan u pismenoj formi prijaviti JKP d.o.o. Vareš.

U slučaju da potrošač odbije ili propusti prijaviti promjenu iz prethodnog stava, to će uz pismenu evidenciju učiniti ovlaštene osobe JKP d.o.o. Vareš.

Član 79.

Ukoliko potrošač odbije ili propusti podnijeti pismenu odjavu, prijaviti promjenu vlasnika objekta, odnosno potrošača, kao i druge promjene bitne za obračun naknade za odvoz smeća, to će uz pismenu evidenciju učiniti ovlaštene osobe JKP d.o.o. Vareš.

Član 80.

Sredstva za obavljanje komunalnih djelatnosti obezbjeđuju se iz:

- prihoda ostvarenih od komunalnih usluga iz segmenta individualne komunalne potrošnje;

- prihoda ostvarenih od komunalnih usluga iz segmenta zajedničke komunalne potrošnje(općinska komunalna naknada-taksa u cijelosti;dijela naknade za drumska,motorna i druga vozila;dijela poreza na imovinu i prihoda od imovine;dijela poreza na promet nepokretnosti;dijela boravišne takse i drugih sredstava);
- budžeta osnivača komunalnog preduzeća;
- drugih izvora po posebnim propisima.

Član 81.

Iz prihoda ostvarenih od komunalnih usluga iz segmenta individualne komunalne potrošnje, iz oblasti prikupljanja,odvoza i odlaganje komunalnog otpada, osiguravaju se sredstva za obavljanje sljedećih komunalnih djelatnosti:

- a) prikupljanje i odvoz komunalnog otpada iz stambenih i poslovnih zgrada i poslovnih prostora na deponiju;
- b) odlaganje komunalnog otpada;

2. SAKUPLJANJE I ODVOZ KUĆNOG SMEĆA

Član 82.

Kućno smeće se odlaže u kontejnere,kante ili u kese za smeće koje će obezbjeđivati Javno komunalno preduzeće d.o.o. Vareš, a koje će se u tačno određene dane voziti iz određenih ulica.

Na isti način će se odvoziti smeće iz mjesnih zajednica iz kojih bude organiziran odvoz smeća.

Broj potrebnih kontejnera,kanti ili kesa za smeće utvrđuje Javno komunalno poduzeće d.o.o. Vareš.

Član 83.

Mjesto za kontejnere za kućno smeće određuje Služba za prostorno uređenje na prijedlog Javnog komunalnog preduzeća d.o.o. Vareš.

Mjesto za kontejnere ne može se određivati na stepeništu, na ulazu u zgradu,trotoaru ili na kolovozu.

Član 84.

Kontejnere za smeće nabavlja, brine se o čistoći i održava ih u ispravnom stanju Javno komunalno preduzeće d.o.o. Vareš.

Član 85.

Korisnici odvoza kućnog smeća dužni su smeće pažljivo odlagati u kontejner tako da se ono ne rasipa i ne prlja okolni prostor.

Zabranjeno je oštećivati kontejnere, ulijevati u njih tekućine, bacati žeravicu ili vrući pepeo, bacati ostatke životinja, građevinski materijal, glomaznu ambalažu, dijelove kućnog namještaja, te otpad iz ugostiteljstva, trgovinskih objekata i mesnica.

Vlasnici ugostiteljskih, trgovinskih objekata, mesnica dužni su otpad iz poslovnih objekata spremati u kese za smeće, te odložiti na mjesto i u dane kako utvrdi Javno komunalno preduzeće d.o.o.Vareš.

Smeće rasuto prilikom odlaganja dužni su ocistiti radnici koji odvoze smeće, a cijena je uključena u ukupne troškove odvoza.

Zabranjuje se odlaganje otpada iz bolnica, domova zdravlja i apoteka u kontejnere za smeće. Otpad iz prethodnog stava odlaže se u skladu sa važećim propisima iz te oblasti.

Član 86.

Odvoz smeća na gradskom području vrši Javno komunalno preduzeće d.o.o. Vareš i to:

■ ponedjeljkom, srijedom, petkom i subotom;
Odvoz smeća iz mjesnih zajednica vrši Javno komunalno preduzeće jedanput sedmično.

Član 87.

Radnici koji odvoze kućno smeće dužni su pažljivo rukovati kontejnerima i kesama za smeće tako da se smeće ne rasipa i ne prlja okolinu, kao i da se kontejneri ne oštećuju. Svako oštećenje ili prljanje prouzrokovano odvozom kućnog smeća, radnici su dužni odmah ukloniti, te pokupiti smeće i površinu pomesti.

Član 88.

Zabranjeno je svako prebiranje i prekopavanje po smeću.

3.KRUPNI OTPAD

Član 89.

Krupni otpad odvozi se prema posebnom planu.

Javno komunalno preduzeće dužno je četiri puta godišnje (dva puta u proljeće i dva puta u jesen) prikupljati i odvoziti krupni otpad.

O vremenu i načinu prikupljanja i odvoza krupnog otpada Javno komunalno preduzeće d.o.o. Vareš je dužno obavijestiti građane.

Korisnici odvoza smeća dužni su krupni otpad odložiti na mjestima i u vrijeme označeno u obavještenju o odvozu krupnog otpada.

Član 90.

Krupni otpad koji se ne sakuplja i odvozi u skladu sa predhodnim članom odluke vlasnik otpada dužan je sam prevesti na gradsku deponiju uz plaćanje naknade za korišćenje deponije od strane trećih lica. Zabranjeno je odlagati krupni otpad na mjesta koja nisu za to određena. Zabranjeno je odlaganje krupnog otpada u kontejnere za kućno smeće.

4.POSTUPANJE SA SAKUPLJENIM OTPADOM

Član 91.

Deponovanje sakupljenog otpada vrši se na gradsku deponiju.

Član 92.

Lokacije deponije određuje Općinsko vijeće.

Općinsko vijeće, na prijedlog Javnog komunalnog preduzeća d.o.o Vareš, određuje način uređenja, održavanja i čuvanja, kao i prestanak korištenja deponije., te daje saglasnost na visinu naknade za korišćenje deponije od strane trećih lica.

Korištenje deponije od strane lica izvan područja općine Vareš odobrava Općinsko vijeće.

Na području općine gdje nije organizovan odvoz smeća građani su dužni smeće odlagati na privremenim lokacijama koje odredi mjesna zajednica u saradnji sa komunalnim i sanitarnim inspektorom.

Član 93.

Zabranjeno je neovlašteno prebirati ili razgrtatiti otpad i smeće i odvoziti ih sa deponije.

Zabranjeno je odlaganje otpada i smeća na lokacije koje nisu za to određene. Uklanjanje ovakvih deponija izvršit će se na trošak lica koja su formirala deponije, a ako su lica nepoznata, na trošak općine.

Na deponiju se ne smiju dovoditi niti puštati domaće životinje, niti se smiju odlagati uginule životinje.

VI UKLANJANJE SNIJEGA I LEDA

Član 94.

Snijeg i led sa javnih gradskih saobraćajnih površina i lokalnih puteva, trotoara i javnih stepeništa uklanja Javno komunalno preduzeće d.o.o. Vareš.

Snijeg sa javnih površina počinje se uklanjati kada dostigne visinu od 5 cm, a ako pada neprekidno mora se uklanjati više puta.

Led sa javnih površina uklanja se čim nastane.

Član 95.

Uklanjanje snijega i leda sa javnih gradskih saobraćajnih površina i lokalnih puteva , trotoara i javnih stepeništa određuje se Programom .

Član 96.

Za uklanjanje snijega i leda ispred poslovnih prostorija i sa krovova poslovnih prostorija odgovorna je pravna ili fizička osoba koja je vlasnik ili korisnik tog poslovnog prostora.

Za uklanjanje snijega i leda ispred stambenih zgrada i sa krovova stambenih zgrada odgovorni su vlasnici ili korisnici stanova u njima.

Za uklanjanje snijega i leda sa trotoara uz kioske i pokretne uređaje odgovorni su vlasnici odnosno korisnici kioska i pokretnih uređaja.

Za uklanjanje snijega i leda sa taxi stajališta odgovorni su taxi prijevoznici koji obavljaju taxi djelatnosti na gradskom području općine Vareš.

Član 97.

Javne saobraćajne površine mogu se, radi sprječavanja nastanka leda, posipati odgovarajućim materijalom.

Član 98.

Zabranjeno je:

1. Iznošenje i gomilanje snijega iz dvorišta, bašta i drugih slobodnih površina na ulice i trotoare;
2. Bacanje snijega ispred stambenih i poslovnih prostorija na saobraćajnicu;
3. Zatvaranje snijegom i ledom slivnika i šahtova;
4. Deponovanje snijega i leda u parkove i na zelene površine;
5. Sanjkanje i sklizanje na javnim saobraćajnim površinama i na zaleđenim vodenim površinama;

Član 99.

Pri uklanjanju snijega i leda ne smiju se oštećivati površine sa kojih se vrši uklanjanje niti objekti i nasadi na tim površinama.

Lice koje ošteti površine, objekte i nasade na površinama dužna je dovesti ih u prvobitno stanje.

VII SANITARNO-KOMUNALNO UREĐENJE NASELJA

1. DRŽANJE ŽIVOTINJA

Član 100.

Zabranjeno je držanje životinja u ulicama gradskog područja: Zvijezda, Put Mira, Čaršija, Franjići, Matijevići, Jušići, Benići (oko bivšeg silosa), Novakovići, Nikovac, Selište (do objekta S-I, S-II i S-III), Tirići (do kuće Islamovića), Stojkovići (do Bazena), Glavica (do groblja), Metalska, Majdanska (do objekta "Trokuća"), Perunska i Ljevarska.

Izuzetno od predhodnog stava dozvoljeno je držanje pasa, mačaka, ptica i dr. ukrasnih životinja, ukoliko se njihovim držanjem ne ugrožavaju susjedni korisnici stanova i objekata i ukoliko nisu ugroženi higijenski, sanitarni ili drugi uslovi gradskog prostora.

Član 101.

Komunalni inspektor može po predhodno pribavljenom mišljenju sanitarnog inspektora u ostalim ulicama gradskog područja odobriti pojedinim domaćinstvima držanje životinja, ako je držanje životinja od bitnog interesa za egzistenciju domaćinstva i ako njihovim držanjem nisu ugroženi higijenski, sanitarni i drugi uslovi tih mjesta.

2.KAFILERIJSKE USLUGE

Član 102.

Leševi životinja moraju se u najkraćem roku odstraniti sa javnih i drugih površina.

Odvoz i zakopavanje leševa životinja iz grada vrši JKP d.o.o. Vareš u skladu sa Programom.

Član 103.

Leševi životinja uginulih ili ubijenih zbog zaraze moraju se na za to na određenom mjestu spaliti, a prostorije i predmeti koji su bili izloženi zagađenju moraju se dezinficirati.

Član 104.

Zakopavanje leševa životinja obavezno se vrši u jamu dubine određene posebnim propisima, uz predhodnu dezinfekciju leša, a poslije zatrpavanja vrši se dezinfekcija površine jame.

Član 105.

Korisnici ili vlasnici uginulih životinja u gradskom naselju kao i drugi građani koji zapaze leš životinja na javnim mjestima, dužni su da to odmah prijave JKP d.o.o Vareš.

Član 106.

Uklanjanje napuštenih životinja u naseljenim mjestima vrši preduzeće kojemu se ti poslovi povjere i sa kojima općinski načelnik zaključi ugovor. Poslovi iz predhodnog stava mogu se povjeriti i specijalizovanim organizacijama ili pojedincima koji raspolažu odgovarajućom opremom za obavljanje poslova uklanjanja napuštenih, izgubljenih i uginulih životinja u skladu sa Zakonom o zaštiti i dobrobiti životinja. Skloništa za životinje i higijenski servisi moraju ispunjavati uslove propisane propisima donesenim na osnovu Zakona o zaštiti i dobrobiti životinja(Sl.Glasnik BiH br.316/09).

Član 107.

Zabranjeno je puštanje i napasanje životinja na javnim površinama.

3. DERATIZACIJA I ODRŽAVANJE VODOTOKOVA

Član 108.

U svrhu zaštite zdravlja građana tokom godine obavlja se sistematska deratizacija dva puta godišnje (proljeće i jesenja) .

Član 109.

Pod pojmom sistematske deratizacije podrazumijeva se postavljanje odgovarajućih mamaca za uništavanje miševa, pacova i drugih glodara.

Član 110.

Preventivna sistematska deratizacija obuhvata javne zelene površine, vodotokove, kanalizacionu mrežu, vodoopskrbne sisteme, deponije smetlišta, industrijske objekte, objekte za proizvodnju i skladištenje i promet životnih namirnica, škole, vrtiće, zdravstvene ustanove, stambene i poslovne prostore (zajedničke prostorije, stubišta, podrumi, tavani i sl.)

Preventivna sistematska deratizacija i vrši se prema planu i programu koji donosi nadležna ustanova.

U skladu sa planom i programom deratizacije nadležne ustanove, Općinski načelnik donosi naredbu o sprovođenju preventivne sistematske deratizacije na području općine.

Za ostale otvorene prostore, troškove obavezne sistematske deratizacije snose korisnici tih prostora.

Pravna i fizička osoba koja vrši deratizaciju dužna je prije početka izvođenja radova obavijestiti građane putem sredstava javnog informiranja o početku i završetku tih radova.

Član 111.

Sistematsku deratizaciju i dezinfekciju u stambenim zgradama vrše vlasnici zgrada odnosno poduzeće kojima je povjereno održavanje zgrade, a o trošku vlasnika odnosno korisnika zgrade.

Sistematsku deratizaciju i dezinfekciju u poslovnim zgradama i prostorijama vrše vlasnici, odnosno korisnici tih zgrada i prostorija.

Član 112.

U svrhu zaštite vodotoka najmanje jednom godišnje vrši se sistematsko čišćenje korita rijeke Stavnje i ostalih vodotoka, kao i uklanjanje korova i drugog samoniklog rastinja iz rijeke Stavnje.

Obim, način, vrijeme izvođenja i ostali uvjeti sistematskog čišćenja korita rijeke i uništavanje korova i samoniklog rastinja utvrđuje se Programom.

VIII UKLANJANJE PROTIVPRAVNO POSTAVLJENIH PREDMETA

Član 113.

Svi protivpravno postavljeni predmeti na objektima i javnim površinama (pokretni uređaji i naprave, štandovi, prikolice, reklamni i drugi panoi, natpisi firmi, obavještenja, putokazi, stubići, pasude za cvijeće, građevinski materijal, ogrijev i sl.) moraju se ukoniti.

Rješenje o uklanjanju sa rokom uklanjanja koji ne može biti kraći od tri niti dulji od osam dana, donosi komunalni inspektor, a ako korisnik odnosno vlasnik protivpravno postavljenog predmeta sam ne ukloni predmet, predmet će ukloniti nadležna inspekcija o trošku vlasnika odnosno korisnika uključujući, troškove premještanja i čuvanja.

Ako je došlo do oštećenja javne površine, uključuju se i troškovi dovođenja javne površine u prvobitno stanje.

Uklonjene predmete vlasnici su dužni preuzeti u roku od 30 dana uz namirenje nastalih troškova, a u suprotnom uklonjeni predmeti će se prodati na javnoj licitaciji radi podmirenja troškova.

IX DEKORACIJA I UREĐENJE GRADA POVODOM PRAZNIKA I DRUGIH MANIFESTACIJA

Član 114.

Povodom državnih i vjerskih praznika i drugih manifestacija od značaja za općinu ili grad, vrši se uređenje i dekoracija grada.

Dekoraciju javnih površina i prostora obavlja pravno lice kome su povjereni ovi poslovi u skladu sa Programom

Član 115.

Pravna i fizička lica koji su korisnici ili vlasnici poslovnih prostorija, moraju imati zastavu BiH, propisima utvrđenog oblika, koja se obavezno postavlja povodom državnih praznika i ističe na za to određenom mjestu.

Član 116.

U roku od 24 sata po isteku državnog praznika ili drugog značajnog datuma utvrđenog ovom Odlukom, zastave se moraju skinuti.

Član 117.

Zabranjeno je isticanje nečiste, pogužvane, pocijepane ili nepropisno izrađene zastave.

U dane nacionalne ili opće žalosti zastave se ističu na pola koplja.

Član 118.

Građani, preduzeća, ustanove, samostalni privrednici i kućni savjeti dužni su za vrijeme državnih i vjerskih praznika pojačati čistoću površina i prostorija koje im pripadaju, a nadležno preduzeće će izvršiti dekoraciju javnih površina i pojačati poslove uređenja, pranja i polijevanja ulica i drugih javnih površina u gradu.

X N A D Z O R

Član 119.

Nadzor nad provođenjem komunalnog reda propisanog ovom Odlukom obavlja nadležna inspekcija i ekološka policija općine Vareš. Poslove komunalne inspekcije obavljaju komunalni inspektori, a poslove komunalno-ekološke kontrole obavljaju ekološki policajci.

Ekološki policajci pri obavljanju poslova moraju imati posebnu odjeću, posebnu oznaku na odjeći i posebne službene iskaznice.

Službene iskaznice komunalnom inspektor i ekološkim policajcima izdaje općinski načelnik

Član 120.

U vršenju nadzora, nadležni inspektor ovlašten je da:

- nadzire primjenu ove Odluke,
- naredi obavljanje radova ako prgledom utvdi da se oni ne obavljaju u skladu sa odredbama ove odluke, ili da se ne obavljaju potpuno ili pravilno,
- zabranjuje obavljanje radova koji se izvode bez odobrenja nadležne općinske službe ili protivno tom odobrenju, odnosno suprotno odredbama ove odluke,
- zabranjuje upotrebu neispravnog komunalnog objekta ili predmeta dok se ne uklone nedostaci,
- naređuje uklanjanje predmeta i objekata koji su postavljeni bez odobrenja, suprotno odobrenju, odnosno suprotno odredbama ove odluke,
- naređuje u saradnji sa Policijskom upravom Vareš, uklanjanje napuštenih neregistriranih, havarisanih i tehnički neispravnih vozila na javnim površinama,
- podnosi zahtjeve za pokretanje krivičnog, prekršajnog i drugih postupaka,
- preduzima i druge mjere sukladno Zakonu.

U vršenju komunalnog nadzora ekološki policajac dužan je i ovlašten da:

- upozorava pravna i fizička lica na ponašanje u skladu sa ovom Odlukom i propisima donesenim na osnovu ove Odluke
- obavještava komunalnog inspektora o slučajevima neizvršavanja odredaba ove Odluke
- pomaže komunalnom inspektor u obavljanju njegovih poslova i
- obavlja i druge poslove koji su mu povjereni

Nadležni inspektor ovlašten je da donosi pismene i usmene naloge u obliku rješenja i zaključka za provođenje radnji navedenih u prethodnom stavu.

Član 121.

Nadležni inspektor i ekološki policajac u obavljanju svojih poslova dužan je pridržavati se Zakona, ove Odluke i drugih propisa.

Ako nadležni inspektor i ekološki policajac u svom radu naiđe na otpor, zatražit će pomoć nadležne Policijske uprave.

Ako izvršilac prekršaja ne postupi po rješenju nadležnog inspektora, naređenu radnju (uklanjanje, čišćenje, popravak, zamjena i sl.), izvršit će nadležni inspektor putem drugog lica o trošku i na rizik izvršioca prekršaja.

Član 122.

Komunalni inspektori i ekološki policajci u obavljanju svojih poslova dužni su se pridržavati Zakona, ove Odluke i drugih propisa.

Komunalni inspektor i ekološki policajac obavljaju poslove nadzora samostalno u ime Općine, postupaju i donose akte u okviru dužnosti i ovlaštenja utvrđenih ovom odlukom i drugim propisima.

Preduzimanje mjera za provođenje komunalnog reda smatra se hitnim i od posebnog interesa za općinu Vareš.

Član 123.

Pravna i fizička lica dužna su komunalnom inspektor i ekološkom policajcu omogućiti nesmetano obavljanje nadzora, a posebno pristup do prostorija, objekata, zemljišta i uređaja i naprava, zatim dati lične podatke kao i pružiti druga potrebna obavještenja.

XI NAKNADA ŠTETE

Član 124.

Svu štetu učinjenu na javnoj površini, objektima i predmetima koji čine njen sastavni dio, ili se nalaze na njoj, učinilac je dužan popraviti uspostavom ranijeg stanja, ili ako to nije moguće, dužan je naknaditi štetu.

Ukoliko izvršilac štete ne plati naknadu za učinjenu štetu, šteta će se naplatiti u odgovarajućem postupku.

Naknada štete može biti stvarna (prema procjeni koju utvrdi pravna ili fizička osoba kojoj je povjereno vršenje pojedinih komunalnih usluga) i paušalna.

Član 125.

Paušalna naknada štete naplaćuje se u slučaju manje štete, ili ako se šteta ne bi mogla sa sigurnošću utvrditi ili ako bi postupak utvrđivanja štete vremenski duže trajao, a vrijednost štete ne premašuje 300 KM prema cjenovniku pravne ili fizičke osobe kojoj je povjereno vršenje pojedinih komunalnih usluga.

XII KAZNENE ODREDBE

Član 126.

Novčanom kaznom u iznosu od 1.000,00 KM do 5.000,00 KM za prekršaj iz ove odluke kaznit će se pravno lice ako:

1. ne održava u urednom i čistom stanju vanjske dijelove zgrada (član 6.),
2. poduzima radove na održavanju i uređenju fasada suprotno članu 7. i 8. stav 2.,
3. postupa suprotno članu 9.
4. postavlja i održava ograde suprotno članu 10. i 11.,
5. postavlja ogradu uz javnu površinu suprotno članu 10. stav 1. ,
6. na javnoj površini neovlašteno postavi reklame, reklamne konstrukcije, panoe i sl (član 12.),
7. postavlja plakate, oglase i slične objave izvan određenih mjesta (član 13. i 14.),
8. ne postupa po odredbi člana 16. stav 2.,
9. postavi reklamni natpis odnosno firmu suprotno članu 17 ,
10. ne ukloni natpis u roku od 15 dana od dana prestanka poslovanja, odnosno iseljenja iz zgrade (član 18),
11. postupa suprotno članu 19.,
12. postavljenе spomenike, spomen ploče, skulpture i slično prlja, uništava ili na drugi način oštećuje (član 21. stav 1.),
13. oštećuje i uništava rasvjetne stubove, rasvjetna tijela, kao i ako lijepi i postavlja oglase obavještenja, reklame i slično na njih (član 24. stav 1.)
14. ne održava u urednom i ispravnom stanju sportska i dječija igrališta i druge javne sportske objekte (član 25.),
15. zauzme javnu površinu bez urbanističke saglasnosti Službe za prostorno uređenje (član 27 i 33),
16. po prestanku rada ugostiteljske radnje kao i po proteku vremena određenog u urbanističkoj saglasnosti za zauzimanje javne površine ne privrede površinu prvobitnoj namjeni (član 34. tačka 6.),
17. javnu površinu koristi suprotno urbanističkoj saglasnosti o zauzimanju javne površine (član 36.),
18. postupi suprotno članu 37.
19. postavlja korpe za smeće suprotno članu 40.,
20. javne telefonske govornice i poštanske sandučice ne održava u ispravnom stanju i ne otklanja kvarove na njima u propisanom roku (član 43.)
21. komunalne objekte i objekte u opštoj upotrebi uništava ili na drugi način oštećuje (član 44.),
22. postupa suprotno članovima 45., 46. i 48.,
23. izlaže i prodaje proizvode izvan prostora tržnice na malo (član 49),

24. bez urbanističke saglasnosti koristi javnu površinu za istovar, smještaj i utovar građevinskog materijala ili za postavljanje skela, odnosno pri izvođenju radova (član 51.)
25. postupi suprotno članu 53,
26. ne očisti i ne uredi javnu površinu oko objekta u kojem obavljaju djelatnosti (član 58.)
27. postupi suprotno pojedinačnim zabranama iz člana 59.,
28. nenamjenski koristi slivnike (član 61 stav 3.)
29. prijevozom materijala vlastitim vozilom prlja javne saobraćajne površine (član 60.),
30. za vrijeme izvođenja radova u otvorima ne preduzme mjere propisane članom 62. stav 3.,
31. ne održava povjerenu zelenu površinu (član 64.),
32. postupa suprotno pojedinačnim zabranama iz člana 68 ,
33. ne vrši organizirani odvoz smeća (član 74),
34. samovoljno premješta kontejnere za smeće (član 83.),
35. postupa suprotno članu 85. stav 2., 3. i 4.,
36. odlaže krupni otpad na mjesta koja nisu za to određena (članu 90. stav 2.),
37. stavlja krupni otpad u kontejnere za kućno smeće (član 90. stav 3.),
38. postupa suprotno članu 93. stav 1. 2. i 3.,
39. ne ukloni snijeg i led sa pločnika ispred svog poslovnog prostora (član 96.),
40. protupravno postavi predmete na javnim površinama (član 113.),
41. postupi suprotno članu 115.,
42. postupi suprotno članu 116.,
43. postupi suprotno članu 117.

Za prekršaj iz stava 1. ovog člana kaznit će se odgovorno lice u pravnom licu novčanom kaznom u iznosu od 200,00 KM do 1.000,00 KM.

Za prekršaj iz stava 1. ovog člana kaznit će se obrtnik novčanom kaznom u iznosu od 500,00 KM do 2.000,00 KM.

Član 127.

Novčanom kaznom u iznosu od 300,00 KM do 1.000,00 KM za prekršaj iz ove odluke kaznit će se fizičko lice ako:

1. ne održava u čistom i urednom stanju vanjske dijelove zgrade (član 6. stav 1.),
2. gomila stare stvari, ostatke namještaja, ogrijevnog drveta i drugih predmeta čime narušava estetski izgled objekta (član 8. stav 2.),
3. postavlja i održava ograde suprotno članovima 10. i 11.,
4. prlja, oštećuje ili uništava plakate i javne oglase koji su postavljeni na određenom mjestu za tu namjenu (član 13. stav 5.),
5. postavlja oglase i slične objave izvan određenih mjesta (član 13.)
6. ne postupi po odredbi člana 15. stav 1. odluke,
7. po prestanku rada ugostiteljske radnje, kao i proteku vremena određenog u urbanističkoj saglasnosti za zauzimanje javne površine ne privede prvobitnoj namjeni (član 34. tačka 6.),
8. postavlja korpe za smeće suprotno član 40.,
9. bez urbanističke saglasnosti koristi se javnom površinom za utovar, istovar i smještaj građevinskog materijala (član 51.),
10. cijepa drva i ugali na javnim saobraćajnim površinama ili ih odmah ne ukloni i ne očisti upotrebljenu površinu kao i odlaže ogrijevno drvo van mjesta koje odredi komunalni inspektor ili eko policija (član 53.),
11. postupi suprotno pojedinačnim zabranama iz člana 59.,
12. postupa suprotno članu 60.
13. samovoljno premješta kontejnere za smeće (član 83),
14. rasipa i prlja prostor oko kontejnera, ako ne usitni ambalažu otpada ili ako oštećuje kontejnere za smeće (član 85.)
15. stavlja krupni otpad u kontejnere za kućno smeće (član 90. stav 3.),
16. postupa suprotno članu 93. stav 1.2. i 3.,

17. prebire ili prekopava po smeću (član 88.),

18. ne ukloni snijeg i led sa pločnika uz zgradu, poslovni prostor i kiosk (član 96.).

Član 128.

Novčanom kaznom od 300,00 KM do 1.500,00 KM za prekršaj iz ove odluke kaznit će se fizičko lice ako:

1. poduzima radove na održavanju i uređenju fasada i drugih vanjskih elemenata suprotno član 7. i 8. stav 1.,
2. sa prozora, balkona, lođa i terasa kao i drugih dijelova zgrada, istresa kuhinjske krpe, tepihe, i slično, baca smeće, cijedi vodu ili na bilo koji drugi način prlja objekte ili javne površine (član 8. stav 3.),
3. na javnoj površini neovlašteno postavi reklame, reklamne konstrukcije, panoe, oglasne ploče, reklamne ormariće i sl. (član 12.)
4. postavljaju plakate, oglase i slične objave izvan određenih mjesta (član 13. i 14.),
5. postavljene spomenike, spomen ploče, skulpture i sl. prlja, uništava ili na drugi način oštećuje (član 21. stav 1.),
6. oštećuje i uništava rasvjetne stubove, rasvjetna tijela, kao i ako lijepi i postavlja oglase, obavještenja, reklame i slično na njih (član 24. stav 1.),
7. ne održavaju u urednom i ispravnom stanju povjerena sportska i dječija igrališta i druge javne sportske objekte (član 25.)
8. zauzme javnu površinu bez urbanističke saglasnosti nadležne službe (član 24. i 30.),
9. javnu površinu koristi suprotno urbanističkoj saglasnosti o zauzimanju javne površine (član 36.),
10. uništava i oštećuje fontane i česme (član 39.),
11. oštećuje, prlja i uništava postavljene objekte i uređaje na javnim površinama (član 44.),
12. postupa suprotno članu 45., 46., 47. i 48. odluke,
13. izlažu i prodaju proizvode izvan prostora za tržnicu (član 49.),
14. postupi suprotno pojedinačnim zabranama iz člana 59 ,
15. vozilom prlja prometnu površinu (član 60. stav 1.),
16. nenamjenski koristi slivnike (član 61. stav 3.),
17. za vrijeme izvođenja radova u otvorima (šahtovima) ne preduzme mjere propisane članom 62. stav 3.,
18. postupi suprotno zabrani iz člana 68.,
19. ne uključuje se u organizirani odvoz smeća (član 74.),
20. odlaže krupni otpad na mjesta koja nisu za to određena (član 90. stav 2. i 3.),
21. postupa suprotno članu 93. stav 1. 2. i 3.,
22. postupa suprotno pojedinačnim zabranama iz član 98.,
23. drži životinje na gradskom području općine (član 100.), drži domaće životinje bez odobrenja (član 101.), pušta i napasa životinje na javnim površinama (član 107.),
24. protupravno postavlja predmete na objektima i javnim površinama (član 113.),
25. postupi suprotno članu 115.,
26. postupi suprotno članu 116.,
27. postupi suprotno članu 117.,
28. ne omogući komunalnom inspektor i ekološkom policajcu vršenje radnji iz člana 120.,

Član 129.

Roditelji odnosno staratelji malodobnika koji je počinio prekršaj sankcioniran članom 127. i 128. ove odluke, kaznit će se novčanom kaznom predviđenom u navedenom članu.

XIII PRIJELAZNE I ZAVRŠNE ODREDBE

Član 130.

Nadležno preduzeće koje vrši odvoz smeća, dužno je u roku od 60 dana od dana stupanja na snagu ove odluke organizovati obavljanje svoje djelatnosti u skladu sa odredbama ove odluke.

Član 131.

Danom stupanja na snagu ove odluke prestaje da važi Odluka o komunalnom redu broj 01-207/02 od 30.12.2002.godine,broj 01-77/04 od 10.06.2004. godine,broj 01-72/05 od 09.06.2005. godine,broj 01-49/07 od 07.03.2007. godine,broj 01-64/07 od 29.03.2007. godine i broj 162/07 od 02.08.2007. godine.

Član 132.

Ova odluka stupa na snagu osmog dana od dana objavljivanja na oglasnoj tabli Općine Vareš.

**PREDSJEDAVAJUĆI
OPĆINSKOG VIJEĆA**

Josip Malbašić

Ova odluka objavljenja je na oglasnoj tabli Općine Vareš, dana 06.05. 2010. godine.

OPĆINSKI NAČELNIK

Hamdo Fatić

Obrazloženje Odluke o komunalnom redu

Pravni osnov za donošenje nove Odluke o komunalnom redu je sadržan u članovima 6.i14. Zakona o komunalnim djelatnostima („Službene novine ZE-DO kantona, broj: 17/08 Članom 6. je navedeno da Općina obezbjeđuje obavljanje komunalnih djelatnosti određenih ovim zakonom.

Članom 9. je navedeno da Općina obavljanje pojedinih komunalnih djelatnosti koje se finansiraju iz njenog budžeta obavezno povjerava javnim preduzećima komunalnih djelatnosti, koje je odlukama općinskog vijeća formirala za obavljanje tih komunalnih djelatnosti i

Članom 14. je navedeno da prava i obaveze između davaoca i korisnika komunalnih usluga regulisati će se općinskim odlukama kojima će se urediti djelatnosti koje se odnose na komunalna preduzeća

Ova Odluka se razlikuje u odnosu na dosadašnju Odluku što su u nju uvrštene odredbe Zakona o komunalnim djelatnostima a odnose se na sasvim drugačiji način regulisanja cijena komunalnih usluga kao i neka druga pitanja. Obzirom da je postojeća odluka pretrpjela već 4 izmjene i dopune, pristupilo se izradi nove odluke radi lakšeg snalaženja i provođenja same odluke.

Nacrt Odluke je usvojen na 17. sjednici Općinskog vijeća koja je održana 31.03.2010. godine uz zaključak da se u narednih 10-15 dana, od strane vijećnika u pisanom obliku obrađivaču dostave primjedbe, prijedlozi i sugestije u cilju izrade što kvalitetnije odluke. Od strane Kluba vijećnika SDP-a dostavljene su primjedbe na nacrt Odluke koje su ugrađene u Prijedlog Odluke. Primjedbe koje su dostavili a nisu prihvaćene ili su djelimično prihvaćene su sljedeće:

1. U članu 19. je predloženo da umjesto “ Program donosi Općinski načelnik najkasnije do 31. decembra za narednu godinu, na prijedlog Službe za prostorno uređenje.” stoji “Program donosi Općinsko vijeće najkasnije do 31. oktobra za narednu godinu, na prijedlog Službe za prostorno uređenje.” Prihvaćeno je “Program donosi Općinsko vijeće najkasnije do 31. oktobra za narednu godinu, na prijedlog Općinskog načelnika” jer je Općinski načelnik ovlašten predlagati, a ne Služba.

2. U članu 28. je bila primjedba da se odredi rok u kojem je potrebno donijeti Program za utvrđivanje lokacija za zauzimanje javnih površina.

Rok se ne može odrediti jer se Program donosi u slučaju postojanja zainteresovanosti stranke za zauzimanje javne površine gdje bi se u skladu sa interesima zainteresovanih stranke i uslovima na terenu određivale lokacije.

3. Predloženo je da se u članu 112. u stavu 2. stavi rok “najkasnije do 15 aprila” a obzirom da izmijenjeni član 112. stav 2., koji glasi “Obim, način, vrijeme izvođenja i ostali uvjeti sistematskog čišćenja korita rijeke i uništavanje korova i samoniklog rastinja utvrđuje se Programom” može se reći da ova primjedba više nema svrhe jer se to reguliše Programom.

Za sprovođenje ove odluke nije potrebno planirati finansijska sredstva u budžetu Općine i predlaže se Općinskom vijeću da je usvoji u predloženom obliku.

**PREDLAGAČ
OPĆINSKI NAČELNIK**

Hamdo Fatić

